



Jens-Erik Kirkegaard, Siumut
Inatsisartunut ilaasortaq
/Maani

**Suliniut Newport pillugu § 37 naapertorlugu apeqquteqaammut nr. 2015-207-
imut akissuteqaat**

Brevdato: 28-08-2015
Sags nr 2015 - 7321
ID nr. 868998

Asasara Jens Erik Kirkegaard,

Aallarniutigalugu apeqquteqaatinnut qujavunga.

Inatsisartut suleriaasianni § 37 naapertorlugu Suliniut Newport aamma mittarfinnik allilerinissat allat pillugit Naalakkersuisunut arlalinnik apeqquteqarputit. Apeqqutit uannut akisassanngorlugit innersuunneqarput.

Aallarniutigalugu paasitissinnaavakkit ukiorpassuit ingerlaneranni nunatsinni mittarfiit ilusiligaanerannik ineriartortitsinissamut periarfissatut ilusiliat arlalippassuit sukumiisumik misissuiffiqeqqissaarneqartarsimmamata.

Oqaatigineqareersutut, naak taakkunani inerniliinernik ersarissunik takusassaqaqngikkaluartoq, misissueqqissaarnermi tunngaviusut annertupput. Mittarfiit ataasiakkaat ineriartortinneqarnerisa malitsigisaannik sunniutaasussat pitsaanngitsut imaluunniit pitsaasut suut erseqqissumik malunniutissanersut inaarutaasumik siumut oqaatigiuminaappoq.

Illuatungaatigut nunatsinni angalariaatsit sunniuteqarluarnerulersinneqarnissaat Naalakkersuisut siunnerfigalugu nalunaarutigaat, taamatullu mittarfiit ilusiligaaneranni pisussami tutsuiginassuseqarneq, innuttaasut tamarmik sunniuteqarluartumik angalasarnissaannik aammalu aaqqiissutissat eqaatsuunissaanik qulakkeerisussa, ataatsimut isigalugu neqeroorutaassasoq, siunnerfigineqarpoq. Tamanna, atuisunut billetsinut akigitit appasinneruneranni, takornarissanit nunatta isertitaqarnerunerani kiisalu kikkunnt tamaginnut inuinnartut imaluunniit inuussutissarsiorlutut angalasutut timmisartumik angalanermik atuisartunut angalanermi atugassarititaasut pitsaanerulersimaneranni, takuneqarsinnaassasoq anguniarneqarpoq.

Nunatsinni attaveqarnermi ataatsimoortumik ineriartortitsinissamut pilersaarummik ukioq manna ukiaanerani ataatsimiinnermi Naalakkersuisut saqqummiussiniarput. Pilersaarummut tassunga tunngaviusussatut pingaarutilittut, tamanna sioqqullugu sukumiisumik misissueqqissaarnermik suliaqarnissaq ilaatinneqarpoq. Suliassani sanaartornissamut pilersaarusiornermut atatillugu, suliassani ataasiakkaanut tunngatillugu aaqqiissutissap pitsaanerpaajusup toqqarneqartarnissaa Naalakkersuisut qulakkeerniarpaat.

Suliniut Newport suliniutaavoq aallaqqaammut Qaasuitsup Kommuniani pinggortinneqartoq, tamatuma kingorna siusinnerusukkut Naalakkersuisuusut

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

oqaloqatigineqarsimallutik – ilaatigut kommunip aamma Namminersorlutik Oqartussat akornanni inissisimanerit agguataarneqarnissaat pillugu.

Mittarfiit ilusiligaaneranni pisussami nunarput tamakkerlugu ineriartortitsinissaq tapertaaffigineqassaaq. Nunarput pitsaanagerusumik ataqatigiissinneqassaaq. Taamaattumik mittarfiup ataasiinnaap immikkuullarissumik, taamaalillunilu ataqatigiissitsiniarnermit avissaartillugu immikkut suliniuteqarfigineqarluni kisimi aallunneqalinnginnissaa pingaaruteqarpoq.

Suliniut Newport taannaanaq isigissagaanni suliniutaavoq pissaganartoq. Mittarfiit ilusiligaanerisa annertusarneqarnissaannut pilersaarut ataatsimoortoq, 2015-imi ukiaanerani ataatsimiinnermi saqqummiunneqartussaq, Ilulissanut tunngatillugu, Ilulissanut annertuunik pitsanngorsaananissamik imaqarpoq, soorlu Suliniut Newport-imut tunngatillugu taamatut pisoqartoq. Kisiannili suliniummi tassani piumasagaataasut, Naalackersuisut nunarput tamakkerlugu ineriartortitsinermik qulakkeerinissamik kissaateqarnerannut naapertuutinngitsut, arlaqarput, taamatullu suliniummi aningaasaqarnikkut pituttuinerit arlallit, ataatsimut isigalugit siunissami ukiorpassuarni nunatsinnut ajoqusiinnaanermik ilimanaateqartut, ilaatinneqarput. Taamaattumik Naalackersuisut Qaasuitsup Kommunia paaseqatigalugu Ilulissani Mittarfimmik ineriartortitsinissap sulissutiginera ingerlatiinnarpaat – Suliniut Newport ilaatinngikkaluarlugu.

Kisiannili tamanna paasineqassanngilaq mittarfissanut aningaasalersuinissamut tunngatillugu aningaasaliisussanik assigiinngitsunik, aningaasassanut aningaasaleerusussinnaasunik, oqaloqateqarnermik aallartitsisoqarsinnaassanngitsoq.

Tulliuttuni apeqquteqaaternut, illit tullerriiarlugit oqaatigisatit malillugit tulleriinnilerlugit, akissuteqaatika erseqqinnerusut, takuneqarsinnaapput.

- 1. Naalackersuisunit ilisimaneqarnerluni, misissuisoqarsimanerluni Nuummi mittarfiup 1199m, 1799m immaqaluunniit 2199m-erisut takissuseqarpat kingunissai pitsaasut ajoqutaasullu suunersut? Soorlu makku pillugit: a) Silaannakkut angallannermi billetsit akiinut sunniutai, b) Nuummut angalanermut akitigut sunniutai, c) Nuuk aqqusaarlugu illoqarfimmut allamut angalanerup akitigut sunniutai d) Takornariat Kalaallit Nunaannut tikittartut amerlassusaanut qanoq sunniuteqassava?**

Assartuussineq pillugu Isumalioqatigiissitap Isumaliutissiissutaani 2011-imi januaarimeersumi misissueqqissaarnerit arlallit, aaqqiissutissanik nassuiaaffiusut, eqikkarneqarput, tassani Nuummi mittarfik 1.799 meterinut imaluunniit 2.200 meterinut allilerneqartussaatinneqarluni. COWI-p aamma NextPartners-ip angallannermi misissueqqissaarnermini, "Ilulissani mittarfik: 2.800 meterinut mittarfiup tallilerneqarnerani timmisartumik angallannermi periaatsimut sunniutaasussat", periarfissatut ilusiliat assigiinngitsut, Ilulissani, Kangerlussuarmi aamma Nuummi mittarfinnik allilerinissanut imaluunniit annikillilerinissanut tunngassuteqartut, misissorpaat. Nunatsinni attaveqarnerup ineriartortinneqarneranut pisussamut atatillugu, tunngaviusussat aalajangiisuulluinnartut ilinnit taaneqartut aammalu isumaga malillugu pingaaruteqartut – billetsinut akigitat aamma takornariatitsisarnermi

periarfissaqarfiusut – pillugit iternga tikillugu aammalu nutartigaasunik paasissutissanik Naalackersuisut piniassamaarput.

2. Taamatutaaq Ilulissani, apeqquut nr. 1-imituut, kiisalu 2800 meter ilanngullugu, misissuisoqarsimanerluni, misissuisoqarsimappat, kingunerisinnaasai pitsaasut ajoqutaasinnaasullu suuppat?

Assartuussineq pillugu Isumalioqatigiissitap Isumaliutissiissutaani 2011-imi januaarimeersumi periarfissatut ilusiliat nassuiarneqarput, tassani Ilulissani mittarfik 1.199 meterinut imaluunniit 1.799 meterinut allilerneqartussaatinneqarluni, kisianni 2.800 meterinut ilaanani. Kisiannili Qaasuitsup Kommuniata suliniutaanut Newport-imut atatillugu suliniummut ataatsimoortumut inuiaqatigiit aningaasaqarneranni misissueqqissaarneq suliarineqarsimavoq, taanna ilisimasat nassuiarneqartut ilaannut tapertaalluni.

Kisiannili Naalackersuisut suliniummut aalajangersimasumut pisussamut tunngatillugu mittarfimmuut suliasamat toqqarneqartumut inuiaqatigiit aningaasaqarneranni sunniutaasussanik misissueqqissaarnermik suliaqarniarput.

COWI-p aamma NextPartners-ip angallannermi misissueqqissaarnermini, "Ilulissani mittarfik: 2.800 meterinut mittarfiup tallilerneqarnerani timmisartumik angallannermi periaatsimut sunniutaasussat", periarfissanut ilusiliat assigiinngitsut, Kangerlussuarmi Mittarfiup allilerneqarnissaanut imaluunniit annikillilerneqarnissaanut tunngassuteqartoq, misissorpaat.

3. Misissuisoqarsimappat, misissuinermi allannguinerit/pisuusaartitsinerit uku ilanngunneqarsimanerlutik; apeqquutit 1 aamma 2 misissorneranni:
a. Kangerlussuaq mittarfittut atorunnaarneqarsimasoq, illuatungaaniilli Kangerlussuaq maannakkutut atorneqarnera allanngortinneqarani: Nuummumut Ilulissanullu angallanneq qanoq sunnerneqassava?

Kangerlussuarmi Mittarfik nunatsinni attaveqarnermi pingaaruteqartunut ilaavoq. Kisiannili mittarfik aammalu attaveqarneq taassuma eqqaaniittoq pisoqaapput aammalu nungullarsimangaatsiarlutik. Mittarfiit ilusiligaanerannut pisussanut toqqaanermut atatillugu taamaalilluni Kangerlussuarmi Mittarfiup siunissaa isummerfigineqartussaavoq. Nunanut allanut angallannermut nunatsinni qitiusumi mittarfittut atorneqaannassappat, Kangerlussuarmi 2 milliarder koruunit angullugit aningaasaleeqqinnissamik pisariaqartitsisoqassasoq naatsorsuutigineqartariaqarpoq. Aningaasaliinissamut pisariaqartitsineq taanna maannamut misissueqqissaarnerni ingerlanneqareersuni tunngavissatut ilaatinneqartarsimanngilaq.

Arlalinnut atatillugu siunissami mittarfiit ilusiligaanissaani Kangerlussuup inissisimanissaanut tunngatillugu periarfissat assigiinngitsut misissoqqissaarneqartarsimapput. Aamma tassani inerniliinerit ersarinngillat, naak ersarikkaluartoq Nuummi aamma imaluunniit Ilulissani Mittarfiit allilerneqassagaluarpata angalariaaseq allanngortussaasoq, aammalu tamatumaa Kangerlussuarmut angallanneq annikillisittussaagaa. Ilaatigut Assartuussineq pillugu Isumalioqatigiissitap

Isumaliutissiissutaani 2011-imi januaarimeersumi periarfissatut ilusiliaq misissuiffigeqqissaarneqarpoq, tassani Kangerlussuaq mittarfittut matuneqarsimatinneqarluni, taamaalillunilu Nuuk Kalaallit Nunaannut pingaarnertut tikittarfiusussaatinneqarluni.

Inuussutissarsionermut, Suliffeqarnermut Niuernermullu Naalakkersuisoqarfiup nalunaarusiami naammassineqaqqammersumi "Takornariatitsisarneq – mittarfiit ilusiligaanerisa allannguuteqartinneratigut ineriartortitsineq aamma siuariartortitsineq", periarfissatut ilusiliat arlallit misissuiffigeqqissaarpai, tassani Ilulissani aammalu Nuummi mittarfiit allilerneqartussaatinneqarlutik. Tassani niuernikkut qanoq inissisimasoaalersinnaaneranut assersuummut (businesscase-mut) neriulluarnartumut annertuumik tunngavissarititatu naatsorsuutigineqarpoq Kangerlussuup atorneqarnera annikillisinneqarsimasoq imaluunniit matuneqarsimasoq.

b. Kangerlussuup atonera minnerpaaffigisinnaasaanut atorneqarnera sulisutigut inissittoq?

Takuuk apeqqut 3a.

c. imaaluuniit Kangerlussuaq silaannakkut angallannermi sillimaniarnerinnaq eqqarsaatigalugu ammatinneqartoq?

COWI-p aamma NextPartners-ip angallannermi misissueqqissaarnermini, "Ilulissani mittarfik: 2.800 meterinut mittarfiup tallilerneqarnerani timmisartumik angallannermi periaatsimut sunniutaasussat", Kangerlussuarmi mittarfiup annikillilerneqarnera qanoq Nuummi aamma Ilulissani mittarfinnut sunniuteqassanersoq, misissorpaat.

d. aningaasaliisartut kisimiillutik, imaluunniit Namminersorlutik oqartussat suleqatigalugit, imaluunniit Namminersorlutik oqartussat kisimiillutik, Nuummi (minnerpaamik 1799) Ilulissanilu (minnerpaamik 2199), taamaasilluni Kangerlussuaq Kalaallit Nunaata timmisartukkat atlantikoq qulaallugu isaaviatut pingaarnertut inissisimajunnaarluni.

Misissueqqissaarneq taamaattoq maannakkorpiaq pigineqanngilaq.

e. Akissut aappiuppat, imaluunniit ilaannakortumik aappiuppat, kingunerisinnaasai pitsaasut ajortullu suuppat, taavalu inerniliineq sunaava?

Isumaqarpunga mittarfiit takissusissaasa politikikkut oqallisigineqarnerat isumaga malillugu tamat oqallinneranni annertuallaartinneqalersoq. Pingaaruteqartoq tassaasariaqarpoq mittarfiup atuuffissaa iluaqutaasusaaq aammalu angallannerup ataqatigiinnerani ataatsimoortumi mittarfiit ataasiakkaat inissisimaffii. Assersuutigalugu mittarfiup takissusaata saniatigut tunngaviusussat arlalippassuupput, mittarfiup pisinnaasaannut aalajangjiisuusussat. Atortussani pissarsiarineqarsinnaasuni motoorit

angissusaat atortuilu pingaaruteqartorujussuupput, taamatullu mittarfiup mikkiartornerani atortut pingaaruteqarlutik. Taamaattumik nunani tamalaani, atlantikup avannaani aamma Kalaallit Nunaanni nunap immikkoortuini mittarfiit akornanni naleqquttumik oqimaaqatigiissitsinissamik qulakkeerinissaq uanga aalluppara.

Kisianni apeqquteqaaternut akissutigalugu, Ilulissani mittarfik 1.199 meterinik takissuseqalersillugu Atlantikup avannaani mittarfinngorlugu tallineqassagaluarpat, tamatuma malitsigisaanik nunap iluani angallannermi ilaasut amerlassuserisartagaat angallannermi annertuumik allannguuteqassasoq naatsorsuutigineqanngilaq. Kisiannili allannguutaasussatut naatsorsuutigineqartut timmisartuutileqatigiiffiit ingerlatsinermi sipaagaqarsinnaaneranniinnerupput.

Ilulissani 1.799 meterimik mittarfeqarluni nunani tamalaani timmisartoqarfeqaleraluarpat, tamanna angallannikkut annertuumik allannguuteqartitsissasoq ilimanarpoq. Nunani tamalaani taamaattumik timmisartoqarfeqarpat, tamatuma Europami aamma Amerikami avannarlermi ornigassanit toqqaannartumik Ilulissanut tassannganiillu angalasinnaanissaq angalasunut ajornarunnaarsissagaa pilerinaateqalersissagaa naatsorsuutigineqartariaqarpoq. Taamaattoqassappat København-ip aamma Kangerlussuup akornanni aqut oqilisaavigineqassasoq, aammalu Kangerlussuup aamma Ilulissat akornanni nunap iluani aqqummi taamaattoqassasoq, ilimanarpoq.

Nunap iluani aqqutini allani angallanneq allannguuteqassanngitsoq ilimanarpoq. Kalaallit Nunaanni tamarmi tutsuiginaratumik, ullutsinnut naleqquttumik ataqatigiissumillu attaveqarnerup katitigaanissaa Naalakkersuisut siunnerfigaat.

4. Naalakkersuisut misissugaateqarnerlutik, imaluunniit misissuisoqarsimaneranik ilisimasaqarnerlutik, inuiaqatigiinnut sunniutaasinnaasut makku pillugit: aningaasaqarnikkut siuariartorneq, suliffii nutaat, takornarissallu amerlassusaannut, Nuummi mittarfik 1199-mut, 1799-imut, 2199-imulluunniit tallineqassappat, misissuisoqarsimappat, kingunerisinnaasai pitsaasut ajortullu suuppat?

Assartuussineq pillugu Isumalioqatigiissitap Isumaliutissiissutaani 2011-imi januaarimeersumi Nuummi mittarfiup 1.799 meterinut imaluunniit 2.200 meterinut tallineqarnissaannut periarfissaq misissorneqarpoq. Isumaliutissiissut misissueqqissaarnermik, Nuummi minnerpaamik 1.799 meterinut tallilerinermut aammalu Nuup pingaarnertut tikittarfiunissaanut pisussanut aallaavigineqartumut sanilliullugu, Ilulissani mittarfiup 1.799 meterinut tallineqarnissaanut suliassap inuiaqatigiit aningaasaqarneranni sunniutissaannut tunngassuteqartumik, imaqarpoq. Nuummi mittarfiup tallineqarnera takornariartitsisarnermut, inuussutissarsiutinik ineriartortitsinermut aamma sunniuteqarluarnerulersitsinermut, billetsit akikinnerulernerannik kinguneqartitsisussamut, aammalu angalanernik pisortanit aningaasalersorneqartunik inuiaqatigiinnut akikinnerulersitsisussamut aammalu ataatsimut isigalugu ornigassanut allanut timmisartumik billetsit akikinnerulernerannik kinguneqartussamut, pitsaasunik sunniuteqassasoq naatsorsuutigineqarpoq.

COWI-p aamma NextPartners-ip angallannermi misissueqqissaarnermini, "Ilulissani mittarfik: 2.800 meterinut mittarfiup tallilernerqarnerani timmisartumik angallannermi periaatsimut sunniutaasussat", Ilulissanut, Kangerlussuarmut aamma Nuummumut aammalu taakkunangaaniit kiisalu nunap iluani angalanerit akornanni angallannerit allannguuteqarnissai misissorpai, imatut pisoqarpat a) periarfissatut ilusiliaq 1: Ilulissani mittarfiup tallineqarnera (2.800 m), tassani Nuummi (950 m) aamma Kangerlussuarmi (2.800 m) mittarfiit allangortinneqaratik, b) periarfissatut ilusiliaq 2: Ilulissani (2.800 m) aamma Nuummi (1.799 m) mittarfiit tallineqarnerat, tassani Kangerlussuarmi (2.800 m) mittarfik allangortinneqarani, c) periarfissatut ilusiliaq 3: Ilulissani (2.800 m) aamma Nuummi (1.799 m) mittarfiit tallineqarnerat, tassani Kangerlussuup (1.199 m) atorneqarnera annikillisinneqarluni aamma d) periarfissatut ilusiliaq 4: Mittarfinnik Ilulissani (2.800 m) tallilernerq aamma Kangerlussuarmi (1.199 m) annikillisitsineq.

5. Taamaattut apeqquut nr. 4-mitut Ilulissani mittarfik eqqarsaatigalugu, kisianni aamma 2800 meter ilanngullugu misissuisoqarsimanerluni?

Aap, apeqquummut 4-imut akissuteqaammi nassuiarneqartutut.

6. Naalakkersuisut misissugaateqarnerlutik, imaluunniit misissuisoqarsimanerani ilisimasaqarnerlutik, qanoq billitsit akii sunnerneqarsinnaanersut, Ilulissiaaraanni, imaluunniit Ilulissat aqqusaarlungu allamut ingerlaqqissagaanni, aammattaarlu takornariat tikittartut Kalaallit Nunaannut amerlassusaat qanoq sunnerneqarsinnaanersoq, Ilulissani Project Newport piviusunngussappat, misissuisoqarsimappat, kingunerisinnaasai pitsaasut ajortullu suuppat?

Najukkami aamma nuna tamakkerlugu billetsinut akigititanut sunniinerusinnaasunik takutitsisunik aalajangersimasunik misissueqqissaartoqanngilaq, aammalu billetsinut akigititat illoqarfinnut assigiinngitsunut tunngatillugu qanoq annertutigisumik allannguuteqassanersut siumut eqqoriaruminaappoq.

Aamma Ilulissani Suliniut Newport piviusunngortinneqassappat, takornariat Kalaallit Nunaannukartartut amerlassusissaannut inerniliussaqaartunik erseqqissunik misissueqqissaartoqanngilaq. Siuariartortitsinissamut tunngaviusussat suliniummi ilaatinneqartut, kingusinnerusukkut piviusorsiorpalaanngitsutut nalilernerqarput. Taamaattumik UKA2015-imi tamanna pillugu aalajangiisoqassappat, mittarfinnut suliassanut aalajangersimasunut toqqartukkanut inuiaqatigiit aningaasaqarnerannut sunniutaasussanik nalilersueqqissaarnermik Naalakkersuisut suliaqassamaarput.

7. Misissuisoqarsimappat Project Newport kingunerisinnaasai pillugit, mississuisoqarsimanerluni allannguinerit/pisuusaartitsinerit uku ilanngullugit:

- a. Kangerlussuaq mittarfittut matusimasoq, Nuullu minnerpaamik 1799 meterimik mittarfeqartoq**

Assartuussineq pillugu Isumalioqatigiissitap Isumaliutissiissutaani 2011-imi januaarimeersumi misissueqqissaartoqarpoq, tassani Kangerlussuaq mittarfittut matuneqartinneqarluni aammalu Nuummi timmisartoqarfik minnerpaamik 1.799 meterimik mittarfeqartinneqarluni, tassanilu Nuummi mittarfik Kalaallit Nunaannut pingaarnertut tikittarfiussasoq naatsorsuutigineqarluni.

b. Kangerlussuaq maannakkutut atornera ingerlaannartooq

Assartuussineq pillugu Isumalioqatigiissitap Isumaliutissiissutaani 2011-imi januaarimeersumi misissueqqissaartoqarpoq, tassani Kangerlussuaq maannakkut inissisimanermituut ingerlaannartinneqarluni aammalu Ilulissani mittarfik 1.199 meterinut imaluunniit 1.799 meterinut tallineqartinneqarluni.

c. imaluunniit Kangerlussuup atornera minnerpaaffigisinnaasaanut atornerqarnera sulisutigut inissittoq, imaalluuni Kangerlussuaq sillimaniarnerinnaq eqqarsaatigalugu sillimmatitut ammatinneqartoq?

Periarfissatut ilusiliamik taaneqartumik ilanngussiffiusumik misissueqqissaartoqanngilaq.

d. Akissut aappiuppat, imaluunniit ilaannakortumik aappiuppat, kingunerisinnaasai pitsaasut ajortullu suuppat, taavalu inerniliineq sunaava?

Matuma siuliani nassuiarneqartutut Suliniut Newport-imi siuariartortitsinissamut tunngaviusussat qaffasissut ilanngunneqarput, taamaattumik Naalakkersuisut siunissami mittarfiit ilusiligaanissaannut atatillugu misissueqqissaarnernik nutartikkanik, attaveqarnermut tamarmiusumut taassumalu malitsigisaanik sunniutaasussanut aalajangersimasumik isummorsorfiusunik saqqummersitsissamaarput.

8. Naalakkersuisut missuisimanerlutik inuiaqatigiit aningaasaqarnerat ataatsimut isigalugu imminut akilersinnaanersoq, tamakkiisumik ilaannakortumilluunniit avataaniit aningaasaliisartut namminersortut peqataatinnissaat mittarfiliornernut atatillugu, Ilulissaniinnaq eqqarsaatigalugu imaluunniit allani aamma?

Maannakkorpiaq misissueqqissaarnernik apeqqummut taassumunnga erseqqissumik akissutaasinnaasunik pigisaqartoqanngilaq. Tamatumunnga pissutaavoq akissutaasussamut, suliniut aalajangersimasoq, minnerunngitsumillu suliniut aalajangersimasoq attaveqarnermut tamarmiusumut ataqatigiissillugu isigalugu qanoq inissisimassanersoq, annertuumik apeqqutaasussaammat.

9. Naalakkersuisut Project Newport-imut atatillugu aningaasaleerusuttunik namminersortunik ataatsimeeqateqarsimanerlutik, suleqatigiissinnaaneq eqqartorlugu, aningaasaaliisartunut inuiaqatigiillu kalaallinut iluaqutaasinnaasoq?

Ilisimavara Suliniut Newport-imut tunngatillugu taamanikkut Naalakkersuisuusut nalaanni atorfilittanit aamma politikkimik suliaqartunit Nextpartners arlaleriarluni

ataatsimeeqatigineqartarsimasoq. Ilanngullugu tassani iluanaarutissanut piumasaqaataasussatut naatsorsuutigineqartut kiisalu pituttuinerit allat saqqummiunneqarsimapput. Kisiannili tamanna pillugu aningaasaliisussanik aalajangersimasunik ataatsimeeqateqartoqartarsimanersoq ilisimasaqarfiginngilara.

- 10. Naalackersuisut misissugaateqarnerlutik, imaluunniit misissuisoqarsimaneranik ilisimasaqarnerlutik, inuiaqatigiinnut sunniutaasinnaasut makku pillugit: aningaasaqarnikkut siuariartorneq suliffiillu nutaat, teknologi nutaaq, ilisimasat nutaat assiat nutaat (takornariaqarnermut attuumassuteqartut allallu) Kalaallit Nunaanni, Project Newport Ilulissani piviusunngussappat, misissuisoqarsimassappat, kingunerisinnaasai pitsaasut ajortullu suuppat?**

Takuuk apeqqut 7-imut akissuteqaat.

- 11. Naalackersuisut misissugaateqarnerlutik, imaluunniit misissuisoqarsimaneranik ilisimasaqarnerlutik, inuiaqatigiinnut sunniutaasinnaasut makku pillugit: aningaasaqarnikkut siuariartorneq suliffiillu nutaat, Kalaallit Nunaanni, billitsit akiinut takornarissallu Kalaallit Nunaannut tikittartut amerlassusaannut sunniutaasinnaasut kiisalu angalanerup sivilissusaannut, Ilulissani mittarfimmik nutaamik 1199 meterimik sanasoqarpat, Nuummilu mittarfik 1199 meterimut tallippat, imaappoq, Ilulissat Nuullu timmisartut sarpillit (propel) kisimik atorsinnaagaat, misissuisoqarsimappat, kingunerisinnaasai pitsaasut ajortullu suuppat?**
- a. Nuuk Ilulissallu 1199 meterinik mittarfittaassappata, ullumikkutut pissutsit iinnassannginnerlutik, Kangerlussuaq avataaniit isaaviusoq, jet-inik motoorilinnut ilaangaanni, taava Nuummilululissanullu ingerlaqqissagaanni sarpilimmul ilaalluni?**
 - b. Apeqqut 11a-mit akissut aappiuppat, mittarfiit 1199 meteriusut takitigisut inuiaqatigiit aningaasaqarnerannut siuariaataassappaat? Aammalu billetsit akii malunnaatilimmik inuiaqatigiinnut takornarianullu appartissinnaavaat, taamaasilluni takornariat amerlanerusut tikittalerlutik tamassuma kinguneralugu inuiaqatigiinni hotellit nutaat suliffiillu nutaat?**

Ilulissani 1.199 meterisut takissusilimmik nutaamik mittarfiliortoqassappat kiisalu peqatigisaanik Nuummi mittarfik 1.199 meterinut tallineqassappat, aningaasaqarnikkut siuariartoqarluni immaqalu aamma nutaanik suliffissanik peqalerluni inuiaqatigiinni malittaasunik sunniutaasussat amerlassusaannut, billetsinut akigititanut sunniutaasussanut kiisalu Kalaallit Nunaannut takornariat amerlassusaannut kiisalu Københavnimut angalanerup sivilissusaannut suut sunniutaasinnaassanersut takutitsisunik ilaannaasumik tamakkiisumilluunniit misissueqqissaarnernik soqanngilaq. Paarlattuanik 2015-imi Inatsisartut ukiaaneranani ataatsimiinneranni tamanna pillugu aalajangiisoqassappat, mittarfinnut suliassani toqqartukkani inuiaqatigiit aningaasaqarneranni sunniutaasussanik misissueqqissaarnernik aalajangersimasunik suliqaarnissamik Naalackersuisut pilersaaruteqarput.

12. KNR-imi tusagassiaq naapertorlugu Attaveqarnermut Naalackersuisoq Knud Kristiansen oqarsimavoq; Project Newport piviusunnungussappat, aningaasaliisartut arlalinnik Namminersorlutik Oqartussanut piunasaqaateqartut. Piunasaqaatit suuppat?

Apeqqutip 12-ip akissuteqarfiginissaanut Aningaasaqarnermut Naalackersuisoqarfimmit ilassutissanik piniarpunga, taannalu matuma kingulianiittunik allappoq:

Newport-imut suliniummik taaneqartoq Qaasuitsup Kommunianit piginnittuuffigineqarpoq, taassumalu suliffeqarfik Nextpartners aningaasaliisussaasinnaasunik aammalu avataaniit aningaasalersuisussaasinnaasunik pilersitsiniarluni periarfissat suunersut misissuitissimavaa. Taamaallutik Naalackersuisut suliami aningaasaliisussaasinnaasunik ataatsimeeqateqarsimanngillat, aamma siunissami mittarfiit ilusiligaanissaat pillugu, maannakkorpiaq mittarfinnut aningaasaliinerusinnaasunut atugassarititaasussat pillugit erseqqinnerusumik oqaloqatigiinnernik pimoorussilluni aallartitsinissamik ajornarunnaarsitsisumik Inatsisartuni aalajangiinermik, sulii suliaqartoqarsimannginnera eqqarsaatigalugu. UKA 2015-imi aalajangiiffigisassatut siunnersuut, suliaqarnerup ingerlaqqinnissaanut erseqqinnerusumik piginnaatitsisussatut naatsorsuutigineqartoq, Naalackersuisut saqqummiuttussaavaat.

Taamaattoq avataaneersunik aningaasaliisoqarluni Newport-imut suliniutip piviusunnagortinneqarsinnaanissaanut Inatsisartuni aalajangiinerit pisariaqartut suussanersut Nextpartners-ip naliliinera pillugu Naalackersuisut paasitinneqarput. Ilanngullugu pingaartumik makkua erseqqissarneqarsinnaapput:

Ilulissat mittarfiup 2800meterinut tallineqareernerata kingorna nunani tamalaani timmisartumik angallannermut Kalaallit Nunaanni pingaarnertut mittarfinngussasoq, aammalu peqatigisaanik Kangerlussuup atorneqarnera annikillisinneqassasoq (mittarfik naannerutilerlugu, ammasarfiit sivikinnerutilerlugit, nunani tamalaani ilaasut il.il. sullinneqarsinnaanerit periarfissaarutsillugu)

Aallarniutissatut akiliutit aningaasaliisartut namminersortut akiliutaasa utertillugit akilernissaannut qularnaveeqqusiussatut aningaasanik ingerlaartunik (minnerpaamik ukiut 10-15) annertuunik Namminersorlutik Oqartussat qularnaveeqqusiisinnaapput.

Oqaatigineqassaaq aatsaat suliniummik killissalersugaasumik ersarissumik aallartitsisoqalerpat aammalu politikikkut piginnaatsitsissuteqartoqarluni, aningaasaliisussaasinnaasunit piunasaqaativiusut paasisimaarineqalersinnaapput. Tamatumunnga aalajangiinissamut tunngavissat saqqummiunneqartussat suliarineqarnerat aammalu AIS 2016-imi naatsorsuutigineqartutut erseqqinnerusumik pilersaarusiorneq, tamatumunnga tunngavissaliinissamut tapertaassapput.

- a) Aningaasaqarnermut Naalackersuisoq Andreas Uldum Sermitsiaq nr. 39, 2015, allappoq aningaasaliisartut Newport pilersinneqareerluni ingerlanneqalerpat amigartoornissamut sillimmaserneqarusuttut (underskudsgaranti). Qanoq ittorpiaq amigartoornissamut sillimmasiineq piunasaqaatigivaat?**

Takuuk apeqquut 12-imut akissuteqaat.

- b) Nalinginnaasumik arlaanut aningaasaliinermi ilisimaneqareertarpoq aningaasaliissutit annaanneqarsinnaanerat. Aningaasaliisartut piunasaqaatigissappassuk Namminersorlutik oqartussat amigartoonnissamut sillimmasiissasut, taava imaannerunnginnerluni aningaasanik attartorneq, taava aningaasaliinerunani, aningaasaliisartut annasaqarsinnaaneq sapiiserfigerusunngippassuk?**

Aningaasaliinermut taamaattumut tunngavissarititaasut, Namminersorlutik Oqartussat suliniummut aningaasaqarnikkut annasaqaataasinnaasut tamaasa akisussaaffigilernerannik, malitseqartariaqassappata, taamatut isiginnittoqarsinnaavoq.

- c) KNR-ip tusagassiornera naapertorlugu Attaveqarnermut Naalakkersuisoq Knud Kristiansen oqariartuuteqarpoq, Project Newportimut aningaasaliisartut namminersortut, aningaasaliissagunik tamakkiisumik, 1 milliard koruuningajannik, piunasaqaatigigaat Ilulissat kisiartaalluni atlankikoq qulaallugu timmisartunut mittarfiussasoq. Naalakkersuisut aningaasaliisartunik ataatsimeeqateqarsimanerlutik paasiniallugu aningaasaliisussat piunasaqaataat allanngortinneqarsinnaanani piunasaqaataansoq, imaluuniit isumaqatigiinniutaasinnaansoq, pineqartut tamarmik inooqataaffigisinnaasaat anguniarlugu?**

Takuuk apeqquut 12-imut akissuteqaat.

- d) Aningaasaliisartut piunasaqaataat ataatsimut isigalugit Naalakkersuisut ataatsimeeqateqarsimanerlutik: paasiniallugu 1) piunasaqaatit 2) sorliit suleqataasuni akuersaarneqarsinnaanersut, 3) sorliit akuersaarneqarsinnaannginnersut, aammalu 4) sorliit isumaqatigiinniutaasinnaanersut, paasiniallugu illuatungeriit tamarmik inooqataaffigisinnaasaannik isumaqatigiittoqarsinnaanersoq?**

Takuuk apeqquut 12-imut akissuteqaat.

- 13. Ilaatigut Attaveqarnermut Naalakkersuisup 16. Juni 2015-imi tusagassiortunut katersortitsinermini saqqummiussai naapertorlugit, ima paasineqarsinnaapput: Nuummi Ilulissanilu mittarfinnik 1199 meterimut tallisitsisoqarluni suliaqartoqassasoq, Kangerlussuarlu aserfallatsaaliorneqarluni. Saqqummiussa q naapertorlugu Kangerlussuaq 800 mio. Kr. missaani akeqassaaq, taamaattorlu ukiumi 10-15-iinnarni atornerqarsinnaanera sivittussalluni. Naalakkersuisunit Siunnersuutissat ukiamut inatsisartunut taamatut isikkoqarlutik saqqummiunniarneqarpat?**

Aalajangiiffigisassat siunnersuut Naalakkersuisut 2015-imi Inatsisartut ukiaanerani ataatsimiinneranni saqqummiutilersaagaat, nunatsinni siunissami mittarfiit ilusiligaanissaannut pilersaarummik imaqartoq, innersuussutigissavara.

- 14. Kangerlussuaq 800 mio. kr. pallillugit aserfallatsaaliorneqassappat, naatsorsugaateqartoqarnerluni qaqugu tamanna aningaasaliineq imminut akilissanersoq? Aammalu taanna aningaasaliineq imminut akileqqaassavaa, Ilulissat 2199 imaluunniit 2800 meterimut tallineqannginnerani, Nuummilu 1799 imaluunniit 2199 meterimut tallineqannginnerani?**

Takuuk apeqqut 13-imut akissuteqaat.

- 15. Imaluunniit pilersaarutaavaa Kangerlussuaq pillugu, 800 mio. Kr. missaani atuereernerup kingorna ukiuni 10-15-ini, kisiartaalluni mittarfiussasoq jet-inik motorilinnik atorneqarsinnaasoq?**

- a. Naalackersuisut isumaqarnerlutik Kangerlussuarmut aningaasaliissutissat pitsaasuusut, eqqarsaatigigaanni inuiaqatigiinni aningaasaqarnermut sunniutigisinnaasai, soorlu suliffiit nutaat, namminersortut hotellinut aningaasaliineri, billetsit akikinnerusut pilersinnissaanut, takornarianik amerlanernik qammaanermut? Misissuisoqarsimanerluni Kangerlussuarnut aningaasaliineq takornarianik amerlanernik tikisitsisalernermik kinguneqassasoq, taamaasilluni aningaasaliissutip imminut akilernissaanut tapiisinnaassammata ilaasut akitsuutaasigut, unnuisarfinni atuinikkut il.il.?**

Takuuk apeqqut 13-imut akissuteqaat.

Inussiarnersumik inuulluaqqusillunga

Knud Kristiansen